



ANG


Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Ispesyal nga Isyu
Marso 29, 2003
www.philippinerevolution.org

Ipataas ang ang-ang sa gubat sa katawhan ug kab-uton ang malukpanong mga abante

Ni Armando Liwanag
Tagapangulo, Komite Sentral,
Partido Komunista sa Pilipinas



Sa tumang kasaya, gisaulog nato ang pagtukod sa Partido Komunista sa Pilipinas diha sa Bagong Hukbong Bayan (BHB) 34 ka tuig na ang milabay sukad niadtong Marso 29, 1969.

Kami, ang Komite Sentral sa Partido, nagsaludar sa tanang Pulang komander ug manggugubat. Kamo mga lig-on ug maisugon nga mga rebolusyonaryo ug gipahalipayan namo kamo sa tanan ninyong mga kadaugan isip pwera sa pakig-away, propaganda, pag-organisa ug produksyon.

Nakahatag kamo og dagkong mga pagtampo sa kinatibuk-ang kadaugan sa Ikaduhang Bantugang Kalihukang Pagtul-id sukad nga nalunsad kini niadtong 1992. Nakakab-ot kamo og mabulukong mga kadaugan sa pagpatuman sa inyong mga tahas sa tulo-ka-tuig nga plano sa 1999-2002.

Ang inyong mga kadaugan naggikan sa hugot ninyong pangako sa rebolusyonaryong kawsa, sa inyong makugihong buhat ug walay puas nga pakigbisog ug taas nga diwa sa pagsakripisyo ubos sa hustong pagpangulo sa Partido ug sa aktibong partisipasyon ug suporta sa katawhan.

Pasidunggan nato ang atong mga rebolusyonaryong martir ug namatay nga mga bayani. Himuon natong inspirasyon ang ilang pagka-dili makaugalingon ug mga sakripisyo. Palig-unon nato pag-usab ang atong rebolusyonaryong determinasyon nga mas maisugong mosukol alang sa nasudnon ug demokratikong mga katungod ug interes sa katawhang Pilipino.

Naunlod sa grabing krisis ang imperyalismong US ug itoy nga rehimeng Arroyo ug nahimo silang bangkrap, desperado ug labing mapahimuslanon ug madaugdau-gon kaysa niadto. Ginalunsad nila ang usa ka palisiya sa larga-tudong gubat batok sa mga rebolusyonaryong pwersa ug katawhan ug gihulagway nilang mga demonyo isip mga "terorista".

Ang tubag nato mao ang pagpataas sa ang-ang sa atong gubat sa katawhan ug pagkab-ot og malukpanong mga pag-asdang sa tibuok rebolusyonaryong pakigbisog alang sa nasudnong kalingkawasan ug demokrasya batok sa imperyalismo ug sa lokal nga mapahimuslanong mga hut-ong sa dakong komprador ug agalong yutaan.

1. PAGBALANSE SA KUSOG SA BHB

Sa Plenum niini niadtong 2002, gisumada ug gituki sa Komite Sentral sa Partido Komunista sa Pilipinas ang pag-uswag sa BHB sukad sa paglunsad sa Ikaduhang Bantugang Kalihukang Pagtul-id. Sa malukpanong pamaagi, dagkong mga pag-asdang ang nakab-ot, ilabina sa dagan sa pagpatuman sa Tulo-ka-Tuig nga Plano sa 1999 ngadto sa 2002. Nakaplastar og pulidong basehan alang sa pagpataas sa gubat sa katawhan ngadto sa bag-o ug mas taas nga ang-ang ug sa pagkab-ot og mas dagkong mga pag-asdang sa malukpanong pamaagi.

Isip rebolusyonaryong partido sa proletaryado, gipangulohan sa PKP ang BHB. Nakapalig-on kini sa ideolohiya, politika ug organisasyon pinaagi sa Ikaduhang Bantugang Kalihukang Pagtul-id ug pinaagi sa pursigidong rebo-

Subay sa iyang superyor nga kusog-militar, ang kaaway nga militar naglunsad og estratehikong opensiba, nagsulay ng liyokan ang BHB...Apan ang problema sa mga pwersa sa kaaway maong gikasilagan sila sa katawhan



lusyonaryong pakigbisog.

Hugot ug tin-aw nga natakda ang pangkinatibuk-ang linya sa bag-ong demokratikong rebolusyon pinaagi sa gubat sa katawhan batok sa langyaw'ng monopolyong kapitalismo, lokal nga pyudalismo ug burukrang kapitalismo.

Hingpit natong gisaway ug gisalikway ang mga "Wala" ug Tuo nga oportunistang linya nga mikutkot sa BHB niadtong dekada 1980 ug sayong bahin sa dekada 1990 ug mihulgang gub-on ang Partido ug tibuok rebolusyonaryong kalihukan hangtud nga malunsad ang Ikaduhang Bantugang Kalihukang Pagtul-id. Napilde nato ang pinakadautang mga pagsulay sa kaaway nga gub-on ang rebolusyonaryong kalihukan gikan sa sulod.

Nasaksihan nato ang padayon nga pagkadunot ug pagdaot sa kaugalingon sa mga rebisyonistang traydor ug dili-matul-id nga mga oportunista kinsa nagbutyag sa kaugalingon isip mga espesyal nga

ahente sa imperyalismong US ug mga lokal nga reaksyonaryo, dili lamang isip mga anti-komunistang propagandista kundili sa pila ka higayon isip intelligence agents ug mga armadong kombatan.

Gipalig-on nato ang alyansa sa mamumuo-mag-uuma isip pundasyon sa atong rebolusyon. Kombinasyon kini sa nangulong hut-ong ug nag-unang pwersa sa rebolusyon. Gihiusa niini ang naghagong katawhan nga naglangkob sa kapin 90% sa katawhang Pilipino.

Gikinahanglan sa rebolusyonaryong makihut-ong nga linya ang estratehikong linya sa malungtarong gubat sa katawhan ug gisiguro niini ang kadaugan sa bag-ong demokratikong rebolusyon pinaagi sa inang-ang nga pagpalambo sa hukbo sa katawhan sulod sa lungtad nga panahon.

Bunga niining estratehikong linya, ang hukbo sa katawhan makatigum og armadong kusog sa kabanikanhan, nag-una sa han-ay sa masang mag-uuma, hangtud nga makabaton ang mga rebolusyonaryong pwersa ug katawhan og katakus ug makamugna og kondisyones alang sa pagsakmit og gahum pangpolitika gikan sa kaaway nga nagbase sa syudad. Tungod niining linyaha, mahimo natong padak-on ang katakus sa pagsulbad sa suliran sa yuta ug pagtuman sa demokratikong unod sa rebolusyon. Naghatag kini kanato'g katakus nga magpalapad ug magkonsolida og baseng masa pinaagi sa pagtukod sa mga organisasyong masa ug mga organo sa politikanhong gahum.

Nakakab-ot ang BHB og armadong kusog pinaagi sa paglunsad og sunson ug kaylap nga gerilyang pakiggubat sa sukaranan sa nagkalalom ug nagkalapad nga baseng masa.

Ginapalambo nato sa hingpit karon ang sayong yugto sa estratehikong dependensiba. Nakab-ot na nato ang mahukmanong gidaghanon sa mga Pulang manggugubat aron makaa-bante ngadto sa hatungang yugto sa estratehikong dependensiba.

Ang BHB adunay libuan nga mga Pulang komander ug manggugubat nga maayo ang pagkabansay ug nasulayan na sa pakigsangka, nga nagbaton og linibo-libong mga ripleng awtomatik ug uban pang mga haypawer nga armas. Ang ihap sa mga Pulang manggugubat midako matag tuig sa tantos nga 10-15% gikan sa 1999 hangtud sa 2001, mas taas sa kanhing tinuig nga tantos nga 8-9%.

Ang ihap sa atong mga haypawer nga riple midako usab og 11-16% sukad niadtong 1999 - 2001, mas taas sa kanhing tinuig nga tantos nga 7.1%. Luyo sa signipikanteng pagdako sa ihap sa atong mga pusil, gilabwan pa gihapon sa atong mga Pulang manggugubat ang mga nagtunhay'ng riple sa ratio nga 3:2. Dako kini nga kakulangan sa mga pusil relatibo sa gidaghanon sa mga gibansay nga manggugubat, wala pay labot ang dakong ihap sa mga reserbang pwersa.

Ang mga pultaym nga manggugubat gidugangan pa og milisyang bayan, nga nagpapel isip rebolusyonaryong kapulisan ug mga reserbang pwersa sa kabaryohan ug sa mga yunit sa kaugalingong depensa nga naglangkob sa tanang himsog ang panglawas nga kalalakian ug kababayan-an sa mga organisasyong masa.

Aduna na kita'y 128 ka mga natarang gerilya nga naglangkob sa kapin-kon-kulang 8,000 ka mga baryo ug mga signipikante nga bahin sa kapin-kon-kulang 700 hangtud 800 ka mga munisipalidad

ug kasyudaran sa kapin 90% sa mga probinsya sa tibuok nasud. Sa kasarangan, langkob sa usa ka natarang gerilya ang 12 ka mga baryo matag munisipalidad.

Ang BHB nagbaton og kusog-kompanya sa 50% sa mga natarang gerilya ug ang nabilin nga 50% adunay mas gamay sa kompanya. Kadaghanan sa mga 15 ka rehiyon nga gitudlo sa Partido sa kasarangan anaay dili mukubos sa unom ka natarang gerilya, nga matag usa anaay kusog-kompanya sa BHB.

Niadtong 2001, mipili ang kaaway og 12 ka mga natarang gerilya isip nasudnong prayoridad nga target alang sa lahutay nga mga kampanyang pagpanumpo, nga ang kinaiya mao ang pagliyak sa dakong pwersa sa kaaway diha sa matag natarang gerilya ug pagdeploy ngadto sa kabaryohan og mga *special operation team* alang sa saywar ug paniktik ingon man sa mga tim alang sa mga operasyong pagpamatay, pagpang-



Ang BHB nagbaton og kusog aron pahimuslan nga krisis sa pangkalibutang sistemang kapitalista ug lokal nga nagharing sistema ug patas-on ang ang-ang sa gubat sa katawhan ug kab-uton ang tanang-natad nga mga pag-asdang sa bag-ong demokratikong rebolusyon.

lungkab ug pagpanilab.

Subay sa iyang superyor nga kusog-militar, ang kaaway nga militar naglunsad og estratehikong opensiba, nagsulay'ng liyokan ang BHB ug nagtinguha nga "siksikon ug gub-on" o kaha, "hawanan, gunitan, konsolidahon ug palambuan" ang pila ka piniling erya. Apan ang problema sa mga pwersa sa kaaway maong gikasilagan sila sa katawhan isip instrumento sa mga imperyalista ug mapahimuslanong hut-ong ug gihimo sila nga mga buta'g bungol kalambigit sa BHB.

Dugang pa, nakapalambo ang BHB og ubay-ubay'ng gidaghanon sa mga natarang gerilya. Mahimong makakonsentra ang mga pwersa sa kaaway sa napulo'g duha niini apan mahimong mapasagdan nga molambo ang kapin 100 ka natarang gerilya. Kun desidido ang kaaway nga konsentran ug akuparon ang bisan unsamang lugara, ginabiyaan usa nato ang teritoryo kabaylo sa pagpalabay og panahon sa ubang erya. Dayon, pagalunsaron nato ang taktikal nga mga opensiba sa mga eksteryor nga linya sa kaaway.

Ang ihap sa mga natarang gerilya nagpabilin sa kapin-kon-kulang 128 sulod sa duha ngadto sa tulo ka tuig tungod sa pagduso sa gimbuhatong konsolidasyon ug dili tungod sa ka-epektibo sa mga kampanyang pagpanumpo sa kaaway. Sa kamatuoran, sa linugdangan sa matag kampanyang pagpanumpo sa kaaway, ang kakuyog niining grabing mga paglapas sa tawhanong katungod maoy nakapasilag sa katawhan, busa nahimo silang labing madasigon kaysa miagi sa pagsalmot sa armadong rebolusyon.

Gilangkob sa mga organisasyong masa alang sa mga mamumuo, mag-uuma, kababayan-

an, kabatan-onan, pangkulturang aktibista ug mga bata ang pinakasolido nga baseng masa sa mga natarang gerilya. Sa kasarangan, miusbaw sila og 19.4% matag tuig niadtong panahon sa 1999 hangtud sa 2001.

Ang populasyon ubos sa nagtunhay'ng mga organo sa politikanhong gahum naglangkob sa gipalapad nga baseng masa nga minilyon-milyon ang gidaghanon. Kadtong mga wala pa matala sa mga organisasyong masa naghatag og nagkalain-laing dagway sa suporta ngadto sa hukbo sa katawhan. Mahimo silang mobilisahon aron mosalmot sa mga aksyong masa.

Relatibong balansyado ang pagkaplastar sa mga natarang gerilya sa tibuok nasud. Singkwen-ta porsyento niini anaa sa Luzon, 20% sa Kabisay-an ug 30% sa Mindanao. Sa kasarangan, ang mga rehiyonal nga komand sa BHB adunay pito ka mga natarang gerilya.

Normal lamang nga ang mga rehiyonal nga komand sa BHB ug mga natarang gerilya dili pupareho ang paglambo sa hisgutanan sa armadong kusog, giabot sa reporma sa yuta ug sa gidak-on, gilapdon ug kalidad sa baseng masa. Natino sa Partido kun unsang mga natarang gerilya ang pinakalambo, dili kaayo lambo ug pinakamayos ang kalamboan sa katuyoang tabangan ang mga naulahi aron makaapas sa mga labaw'ng lambo ug patas-on ang kinatibuk-ang ang-ang sa kalamboan ngadto sa bag-o ug mas taas nga ang-ang.

Isip nag-unang organisasyon sa Partido, ang BHB mao ang anaay pinakataas nga konsentrasyon sa mga membro sa Partido. Kini ang nag-unang organisasyon aron suod nga makalambigit ang Partido sa

Ang ekonomikanhon ug pinansyal nga krisis nga karon nahiaguman sa tanang tulo ka sentro sa pangkalibutang kapitalismo (ang US, Japan ug European Union) nagmugna sa pinakareaksyunaryong mga sulog sama sa pasismo, rasismo ug mga gubat pagpanulong.



pinakadakong gidaghanon sa naghagong masa. Kini ang pinakagamhanang instrumento sa Partido ug katawhan alang sa pagsakmit sa politikanhong gahum.

Ang nag-unang tinubdan sa kusog sa BHB mao ang alyansa sa mamumuo ug mag-uuma. Dugang pa niini, tinubdan usab sa iyang kusog ang mga alyansa sa mga progresibong pwersa, mga patriyotikong pwersa ug mga alyansa sa mga dili istable ug dili kasaligan nga mga alyado sa pinakalapad nga matang sa alyansa alang sa pagpahimulag ug pagpilde sa kaaway sa matag gitakdang panahon.

Ang BHB nagbaton og kusog aron pahimuslan ang nagkasamot nga krisis sa pangkalibutang sistemang kapitalista ug lokal nga nagharing sistema ug patas-on ang ang-ang sa gubat sa katawhan ug kab-uton ang tanang-natad nga mga pag-asdang sa bag-ong demokratikong rebolusyon.

2. KRISIS SA US UG SA PANGKALIBUTANG SISTEMANG KAPITALISTA

Gipanghambog sa US ug mga reaksyonaryong Pilipinong itoy niini nga walay pulos ang pakigsangka sa katawhang Pilipino ug mga rebolusyonaryong pwersa batok sa US kay kini kunohay ang bugtong *superpower*, nga mao ang pinakakusog nga ekonomikanhon ug politikanhong gahum sa pagkakaran. Gipakaingon nga walay pwersa sa kalibutan nga makasanta niini sa paghimo sa kagustohan niya.

Sa kamatuoran, ang US dunot sa kinauyokan. Bug-os nga nagsalig ang katawhang Pilipino ug mga rebolusyonaryong pwersa nga mapakig-awayan nila kini tungod kay mas milalom ug misamot ang ekonomikanhon ug pinansyal nga krisis niini sukad sa katapusan sa Ikaduhang Gubat Pangkalibutan ug tungod kay nakapahimulag kaniya ang iyang imperyalista ug teroristang palisiya sa pagpanulong.

Sa mga imperyalistang kanasuran, ang US mao ang hilabihang nakapahimulos sa globalisasyon sa "gawasnong merkado." Tungod sa taas nga tantos sa interes ug ganansya niini, nakadani ang US og langyaw'ng pamuhunan sa mga sapi, bono (*stocks and bonds*) ug uban pang kabtangan (*assets*) gikan sa kaugalingon niining mga imperyalistang kaalyado ug mga nasud nga nagmugna og lana. Gigamit niini ang mga langyaw'ng pundo aron katagan-an og salapi ang konsumerismo, walay pugongpugong nga ispekulasyon sa mga sapi ug mga panagtapo sa mga korporasyon (*corporate mergers*), pamuhunan sa laing kanasuran ug produksyong militar.

Gipanghambog sa US ang "bag-ong ekonomiya" niini nga padayong naglabong nga walay disempleyo apan wala mitaas ang suholan gumikan sa pagpanguna sa US sa *high technology* ug, pinakamahinungdanon, tungod sa pagtibhang sa suholan ug pagpakunhod sa galastohan alang sa katilingbanong serbisyo¹. Sa kamatuoran, artipisyal nga gipalutaw sa mga langyaw'ng pagpangutang ang ekonomiya sa US.

Human gilayon sa pungkay niini niadtong 2000, kalit nga mitidlum ang "bag-ong ekonomiya" sa US matag tuig. Sukad niadto, lungtad nga midaus-os ang *stock market* (baligyaanan og sa mga sapi), ug naguba ang kapin US\$8 ka trilyon. Paspas nga nahugno ang industriyal nga produksyon ug milutaw ang dagkong mga pagpangilad sa mga korporasyon bahin sa mga sapi, bono ug pautang. Ang mga mugbo nga panahon sa gagmay'ng pagtubo gisundan og dugang mga pagdaus-os.

Bangkrap, kun tugkaron, ang ekonomiya sa US. Anaa kini'y kasamtangang pangpublikong utang nga US\$6.4 ka trilyon ug netong langyaw'ng utang nga US\$2.8 ka trilyon. Walay hunong ang pagdako sa depisit niini sa pamatigayon. Nawagtang na ang surplus sa badyet ubos sa rehimeng Clinton ug aduna nay dagkong mga depisit sa badyet ubos sa rehimeng Bush. Pursigido ang rehimen nga tibhangan ang mga pundo alang sa katilingbanong paniguro (*social security*) bisan human mahurot ang mga pundong pangpensyon ug personal nga tinipigan nga gigamit isip kolateral *on margin*² sa 40% sa mga pamilyang Amerikano.

Apan ang administrasyong Bush naghatag sa mga monopolyong burgesya og dakong tibhang sa buhis nga mokabat og US\$2.65 ka trilyon sulod sa napulo ka tuig; naggasto og US\$400 ka bilyon alang sa paglunsad og duha ka gubat pagpanulong nga sunson nga managkasunod; ug nagahulga usab og gubat batok sa Syria, Iran ug sa Democratic People's Republic of Korea.

Gipahimuslan sa rehimeng Bush ang pagbunok sa simpatiya sa katawhan sa tibuok kalibutan alang sa mga pamilya sa mga nabiktima ug sa katawhang Amerikano human sa Septembre 11 nga pagpangataki ug gigamit gilayon ang mga ataki isip pasumangil sa paghulga o kaha paglunsad og teroristang gubat sa US batok sa mga gobyerno nga nagduso sa ilang kaugalingnan ug batok sa mga kalihukan alang sa nasudnong kalingkawasan.

Sa ngalan sa kontra-terorismo, tuyong nagaaghat og pagsalimu-ang sa gubat ang rehimeng Bush, nagaduso og pasismo ug pagpamitol sa pangkalibutang

linangkuban ug aktwal nga nagabuhat og interbensyong militar, sama sa Pilipinas, ug nagalunsad og mga gubat pagpanulong, sama sa Afghanistan ug Iraq, aron pakusgon ang produksyong panggubat ug sakmiton ang mga tinubdan ug ruta sa suplay sa lana.

Tungod kay suod ang koneksyon niini sa *military industrial complex* ug sa mga monopolyo sa lana, nagtuo ang nagharing pundok ni Bush nga pinaagi sa pagpabor niining mga sektora, mapalagsik sa US dili lamang ang ekonomiya sa US kundili ang tibuok pangkalibutang sistemang kapitalista.

Apan ang pagpabundat niining mga sektora dili makapahimugso og igo nga pangempleyo aron makapahimugso og dugang nga *consumer demand*³ relatibo sa krisis sa sobrang produksyon sa US ug sa pangkalibutang sistemang kapitalista.

Ang ekonomikanhon ug pinansyal nga krisis nga karon nahiaguman sa tanang tulo ka sentro sa pangkalibutang kapitalismo (ang US, Japan ug European Union) nagmugna sa pinakareaksyonyong mga sulog sama sa pasismo, rasismo ug mga gubat pagpanulong. Gigamit sa monopolyong burgesya ang pinakareaksyonyong mga argumento aron ipasangil ngadto sa katawhang dili puti ang kaliwat ang krisis ug iduso ang pagkusog sa mga pasista, rasista ug magubatong mga sulog.

Ang US mao ang numero uno nga imperyalistang gahum. Ang krisis nagtulod niini nga mosakmit og dugang mga teritoryong pang-ekonomiya (mga semikolonya ug dependenteng mga kanasuran) ug pahimuslan kini isip tinubdan sa mga hilaw'ng materyales, nataran



Ang mga mamumuo ug dinaugdaog nga katawhan sa kalibutan mibangon sa dinagkong mga aksyong masa aron protestahan ang imperyalistang gubat pagpanulong sa US batok sa Iraq.

sa pamuhunan, merkado, *salient points of control*⁴ ug mga nataran sa impluwensya.

Ang US mao ang numero unong teroristang gahum. Kini ang pinakadakong tigmugna, tigpundo ug tiggamit sa nukleyar, kemikal ug biolohikal nga *weapons of mass destruction* (mga armas alang sa dinaghang pagpanggun-ob). Kini ang bugtong gahum nga nakagamit og bomba atomika aron silaban ang papulasyon sa kasyudaran, sama sa Hiroshima ug Nagasaki. Migamit kini og mga kemikal aron patyon ug makapatakboy og balatian sa entero nga mga komunidad ug mahiloan ang kalikupan (*environment*) sama sa Indochina. Walay pugongpugong kini nga naggamit og nagkalain-laing klase sa mga makalilisang nga mga kasangkapang panggubat sama sa *cluster bombs*⁵, *smart bombs*⁶, mga bomba nga anaay *depleted uranium*⁷ ug uban pa batok sa mga dili militar nga target, nga nagbunga sa kaylap nga kamatayon, pagkasamad, sakit ug kadaot.

Nakapatay kini og kapin 10 ka milyon ka tawo sa mga gubat pagpanulong sukad sa katapusan sa Ikaduhang Gubat Pangkalibutan, sama sa Korean War (4.5 ka milyong Koreano), Vietnam War (6 ka milyong Vietnamese) ug sa unang gubat pagpanulong batok sa Iraq (150,000). Naghulhog kini og mga anti-komunistang pagpangmasaker, sama sa pagpamatay sa 1.5 ka milyong Indonesian niadtong 1965. Nagpahimugso kini og mga gubat nga *fratricidal*⁸, nga mipatay og kapin usa ka milyong tawo sama sa Rwanda ug gatusan ka libong tawo sama sa Congo ug sa kanhing Yugoslavia.

Pinaagi sa mga *embargo*⁹ gipaluyohan sa US ang pagkama-

Ang katawhang Pilipino ug mga rebolusyunaryong pwersa dili malingla sa mga panaad sa US ug mga Pilipinong itoy niini...Wala usab mahasi ang katawhang Pilipino ug mga rebolusyunaryonh pwersa sa pangteknolohiya ug pangmilitar nga gahum sa Imperyalismong US.



tay sa 1.5 ka milyong Iraqi ug kapin-kon-kulang 750,000 ka mga bata. Pinakadautan niini, bisan walay dayag nga akto sa pisikal nga kabangis, ang mga imperyalistang US nagpahamtang og inadlaw-adlaw'ng kabangis sa neokolonyal nga pagpahimulos ngadto sa binilyon-bilyong katawhan sa managkasunod nga henerasyon.

Sa kasamtangang gubat pagpanulong batok sa Iraq, nasaksihan nato ang pagpamiktima sa giingong mga pwersang koalisyon ngadto sa katawhang Iraqi labaw sa tanan ug pagsilot sa gobyernong Iraqi tungod sa paghingusog niini sa nasudnong kaugalingnan. Sa samang higayon, nakit-an nato ang signipikanteng pagkabuak diha sa alyansa sa mga imperyalistang gahum, nga tataw ang usa ka bahin ang US ug Britain ug sa laing bahin ang France, Germany ug Russia.

Bisan kun sa kinatibuk-an,

nagkahiusa sila batok sa katawhan sa kalibutan ug batok sa mga rebolusyonaryong kalihukan, ang mga imperyalistang gahum gitukmod sa krisis sa pangkalibutanang sistemang kapitalista aron mas grabing makigtigi sa isi'g usa kaysa niadto ug masuko sa walay pugongpugong nga kahakogan sa bugtong *superpower* sa paghakop sa pinakadakong pahat sa mga tinulis.

Sa unang gubat pagpanulong batok sa Iraq, gipapas-an sa US sa mga kaalyado niini ang kadaghanan sa galastohanang gubat. Apan gihakop niini ang kadaghanan sa mga linungkab sa gubat pinaagi sa pagpahamtang og mga kontrata sa militar ug uban pang mga kontrata sa mga kanasurang nagmugna og lana, paghugut og kontrol sa suplay sa lana sa Japan, Europe ug uban pang dapit sa kalibutan ug pagpugos sa Palestinian Liberation Organization nga muyukbo sa Zionistang laraw sa US ug Israel nga paghari sa Palestine ug sa Middle East.

Nagkunsabohay ang US ug Europe nga sistematikong bahinbahinon ang kanhing Yugoslavia. Apan ang US ang mihakop og pinakadakong benepisyo pinaagi sa pagpalapad sa NATO subay sa estratehikong plano sa US ug sa pagbabag sa mas daginot nga mga pipeline sa lana padulong sa Central ug Western Europe nga moagi sa Russia o kaha sa *Danube* ug sa *Rhine*¹⁰.

Tungod sa gubat pagpanulong batok sa Afghanistan, nakakab-ot ang US og luna alang sa dugang pagsulod sa Central Asia ug Caspian Sea Region ug alang sa usa ka pipeline sa lana nga moagi sa Afghanistan ug Pakistan ngadto sa kabaybayonan sa Arabian Sea ug sa Indian Ocean, nga motipas

sa Gulf ug nagpugong sa uban nga pamuhunan sa mga pipeline padulong sa Russia ug China.

Sa kasamtangang gubat pagpanulong batok sa Iraq, tinguha sa US nga direktang kontrolon ang ikaduha sa pinakadakong prodyuser sa lana sa Organization of Oil Exporting Countries (OPEC) ug dayon, dugang kontrolon ang OPEC, ang Middle East ug ang kanait nga mga rehiyon sa Central Asia ug Caspian Sea. Tinguha usab niining balihon ang tendensya sa mga kanasuran sa OPEC sa paggamit sa Euro imbes nga dolyar sa US isip salapi sa mga transaksyon bahin sa lana ug silutan ang Iraq sa pagpasiugda niini sa naingong tendensya sa ulahing bahin sa 2000¹¹.

Ang mga mamumuo ug dinaugdaog nga katawhan sa kalibutan mibangon sa dinagkong mga aksyong masa aron protestahan ang imperyalistang gubat pagpanulong sa US batok sa Iraq. Timaan kini sa nagkataas nga matngong pagsupak ug pakigbatok sa katawhan sa imperyalismo. Ang katawhan sa kalibutan dugay nang nasilag sa mga ekonomikanhon ug katilingbanong katalagman nga gibuhian sa monopolyong kapitalismo batok kanila.

Nagkahait ang mayor nga mga kontradiksyon sa kalibutan sama sa kontradiksyon tali sa mga imperyalista ug dinaugdaog nga mga katawhan, tali sa mga imperyalista ug mga gobyernong naghingusog sa nasudnong kaugalingnan, sa han-ay sa mga imperyalistang gahum ug tali sa monopolyong burgesya ug proletaryado sa mga imperyalistang nasud. Ang ekonomikanhon ug pinansyal nga krisis naghimugso sa katilingbanon ug politikanhong krisis ug kaguliyang sa pangkalibutang linangkuban.

Ang US buy-ad nga nagbahis-bahis sa kahambugon sa usa ka *hyperpower*¹², nagayatak sa nasudnong soberanya sa mga katawhan sa kalibutan ug nagatulis sa ilang katilingbanong bahandi. Gipanghambog sa kasamtangang mga politikanhong pasimuno sa monopolyong burgesya sa US nga mahimong makatukod ang US og pinakadakong gingharian sa kasaysayan sa sangkatauhan pinaagi sa paggamit sa dili mabangbang nga *high-tech* nga gahum militar niini ug pagpahimulos sa ekonomikanhon ug katilingbanong pagkaunlod sa Ikatulong Kalibutan ug sa kanhing kanasuran sa *Soviet bloc*, nga samang naduot sa langyaw'ng utang nga mokabat sa US\$3 ka trilyon.

Ang mga imperyalistang US naggamit og tanang pasumangil aron atakihon ang mga gobyerno nga naghingusog sa ilang kaugalingnan. Labaw'ng sunson ang ilang panagbingkil bisan sa



Ubos sa kasamtang ug umaabot nga kahimtang, ang katawhang Pilipino ug ilang mga rebolusyunaryong pwersa makahimong pakusgon ang armadong pakigbisog ug magtumong sa kadaugan sa bag-ong demokratikong rebolusyon.

ilang kaugalingong mga imperyalistang kaalyado ug uban pang kanhing mga itoy nga gobyerno. Ug diha sa lugar sa mga imperyalista, dugang nagasukol ang proletaryado ug katawhan kaysa niadto.

Ang katawhang Pilipino ug mga rebolusyonaryong pwersa dili malingla sa mga panaad sa US ug mga Pilipinong itoy niini nga nagbung-aw na ang pagrekober sa ekonomiya sa US ug sa pangkalibutang sistemang kapitalista ug kini ang kasulbaran sa ekonomikanhong depresyon, dinaghang kawalay trabaho ug kuyanap nga kalisdanan sa Pilipinas. Walay hunong nga ginapasamot sa US ug mga itoy niini ang pagpanglupig ug pagpahimulos sa katawhang Pilipino.

Wala usab mahasi ang katawhang Pilipino ug mga rebolusyonaryong pwersa sa pangteknolohiya ug pangmilitar nga gahum sa imperyalismong US. Nasaksihan nila kun sa unsa napakyas ang naingong gahum sa mas naunang mga gubat sa katawhan sa Asia, sama sa China, Vietnam ug Korea. Nagmadaugon mismo sila sa pagpakyas sa matag laraw sa US nga gub-on ang rebolusyonaryong kalihukang masa. Nakapangibabaw sila sa pasistang diktaduryang Marcos nga gisuportahan sa US ug sa mosunod nga mga reaksyonaryong rehimen.

Gibutyag mismo sa US ang kainutilan niini sa pagkapakyas sa mga pagsulay niining gub-on ang usa ka gamay nga bandidong gang, ang Abu Sayyaf, nga gitukod niini niadtong dekada 1990 aron pahuyangon ang Moro National Liberation Front. Bisa'g unsaon, gigamit niini ang gi-organisa sa CIA nga teroristang gang isip pasumangil sa interbensyong militar sa US batok sa mga

rebolusyonaryong pwersa sa katawhang Pilipino ug sa Bangsamoro, partikular sa mga armadong kusog sa Partido Komunista sa Pilipinas ug sa Moro Islamic Liberation Front (MILF). Dihang nahimo kining mas manakupay ug mas mapanulongon, kay giduso kini sa krisis, ang mga imperyalistang US dugang giharong sa pagsukol sa mga mamumuo ug linupigang katawhan, mga independenteng gobyerno ug iyang kaugalingong imperyalistang mga karibal.

Ang mga armadong rebolusyonaryong kalihukan sa Pilipinas, Nepal, India, Turkey, Palestine, Colombia, Venezuela, Iran, Peru ug uban pang kanasuran mahimong mokusog pa ug makahatag-inspirasyon sa mas daghang katawhan nga latason ang dalan sa armadong rebolusyon. Ang mga gobyerno sa China, North Korea, Cuba, Vietnam, Syria, Iraq, Libya ug uban pang kanasuran mahimong maghingusog sa nasudnong kaugalingnan sa nagkalain-laing ang-ang aron supakon ang mga aktong pagpanulong sa US.

Ubos sa kasamtangan ug umaabot nga mga kahimtang, ang katawhang Pilipino ug ilang mga rebolusyonaryong pwersa makahimong pakusgon ang rebolusyonaryong armadong pakigbisog ug magtumong sa kadaugan sa bagong-demokratikong rebolusyon. Andam sila nga harungon ug pakigbatukan ang matag pagkusog sa interbensiyong militar sa US ug bisan ang tudo-largang gubat pagpanulong sa US.

Mahangupon nilang gidawat ang hagit ug oportunidad nga makapanimalos sa mga imperyalista sa pagpatay sa mga pwersang pang-akupar sa US ngadto sa 1.5 ka milyong Pilipino sukad pa sa pagsugod sa Filipino-American War

**Ingon na lamang ang
pagkasiak-siak ug ang
pagkabahin sa nagharing
koalisyon ni Arroyo sa
kompetisyon sa korapsyon,
busa si Arroyo mismo
nawad-an na kaayo'g
kredibilidad ug nahimulag
tungod sa kainutil niya nga
magpahayag og unsamang
katuohan nga palisiya nga
makapagaan sa makalooloy
nga katilingbanong
kahimtang**



niadtong 1899 hangtud sa katapusan sa kampanyang pasipikasyon niadtong 1913 ug tapuson ang pagpahimulos ug pagpanaugdaog nga nahiaguman sa managkasunod nga mga henerasyon sa mga Pilipino ubos sa imperyalismong US sulod sa kapin usa ka siglo.

3. NAGKASAMOT NG KRISIS SA LOKAL NGA NAGHAHARING SISTEMA

Ang labaw'ng nagkasamot nga krisis sa US ug pangkalibutang sistemang kapitalista nanggun-ob sa semikolonyal ug semipyudal nga nagharing sistema sa Pilipinas. Paspas nga nagkasamot ang malukpanon ug lungtad nga krisis sa sistema. Walay kaipsotan sa

krisis ang mga mapahimuslanong hut-ong sa dakong komprador ug agalong yutaan.

Ubos sa islogan sa globalisasyon sa "gawasnong merkado," gidili sa imperyalismong US sa itoy nga estadong Pilipino ang pagtakda og pangpublikong pundo aron paghimo o kaha pagkati sa pagpalambo sa nasudnong industriya. Gipahamtang niini sa estado ang liberalisasyon sa pagsulod sa langyaw'ng kapital ug mga produkto, praybitisasyon sa mga kabtangan sa estado ug pagtangtang sa mga regulasyon nga naghatag og pila ka proteksyon sa naghagong katawhan ug kalikupan.

Walay ubang produkto nga mabaligya ang Pilipinas sa pangkalibutang merkado kundili mga hilaw'ng materyales ug mga semimanupaktura nga ubos ang dugang-bili (*low value-added semimanufactures*). Kining tanan, naghinobra ang suplay. Maka-eksport pa gihapon og susamang produkto apan sa mas ubos nga presyo. Sa samang higayon, giablihan sa estado ang merkadong Pilipino sa pagbaha sa tanang matang sa mga produkto, lakip ang mga nag-unang produktong agrikultural ngadto sa kadaotan sa mga lokal nga prodyuser.

Luyo sa komprehensibong nasudnong base sa kahinguhaan (*comprehensive national resource base*) ug sa dakong populasyon niini, ang Pilipinas anaay takilid nga ekonomiya tungod sa imperyalista ug pyudal nga pagpahimulos. Nag-import kini og dakong kantidad sa tanang matang: mga manupaktura nag-una alang sa pangonsumo, mga ekwipo ug hilaw'ng materyales alang sa limitadong pagproseso, dakong kantidad sa sugnod (*fuel*) ug mga produktong pangusyos alang sa hataas nga mga hut-ong.

Ang kasagarang tinuig nga resulta mao ang dakong pag-usbaw sa depisit sa pamatigayon ug sa langyaw'ng utang, nga milapas na sa US\$54 ka bilyon. Sa matag pagtunhay sa surplus sa pamatigayon sa unsamang talagsaong tuig, resulta kini sa pagtibhang sa mga import ug lokal nga produksyon. Sa pagkakaron, ang rehimeng Arroyo nagsalig og maayo ug anaay utang-kabuut-on sa US tungod kay nangutang kini sa mga bangko sa US og sa kasarangan US\$51.7 ka milyon matag bulan sa mapihigong mga kondisyones.

Nabutyag ang pagkabangkrap sa ekonomiyang Pilipino dili lamang sa naglut-od nga mga depisit sa langyaw'ng pamatigayon ug langyaw'ng utang kundili usab sa padayon nga nagkadakong depisit sa badyet ug lokal nga pangpublikong utang sa reaksyonaryong gobyerno. Nagsulabi ang kakulang sa buhis ug uban pang koleksyon sa gobyerno sa nagakataas nga galastohanang alang sa pinakakontra-produktibong mga katuyoan.

Ang paghugno sa kinitaan sa estado bunga sa pang-ekonomiyang depresyon, liberalisasyon sa pamatigayon, sa kanhing praybitisasyon sa mga korporasyon sa gobyerno ug burukratikong korapsyon. Nagakataas ang panggobyernong galastohanang alang sa pagbayad sa utang, sa militari ug kapulisan, mga proyektong pang-imprastruktura nga napuno sa korapsyon, ug mga pangusyos nga pasilidad sa kadagkoang opisyal sa gobyerno. Nagdaus-os ang katilingbanong paggasto alang sa pangpublikong edukasyon, amumang panglawas ug pabalay.

Nasilag ang mabagang masa sa katawhan sa gipalobo nga mga

numero alang sa balor sa produksyon sa sektor sa serbisyo ug sa mini nga mga pag-angkon sa rehimen og relatibong taas nga tantos sa pag-usbaw sa *gross national product*. Sa aktwal, hugno ang produksyon tungod sa taas nga gasto sa imported nga mga sangkap ug paghugno sa *demand* tungod sa kunhod nga kinitaan.

Kuyanap ang pagkabangkrap ug dinaghang pagpanangtang sa trabaho. Bisan ang rehimen miangkon og kapin 10% nga tantos sa kawalay trabaho. Ang tinuod nga akumuladong kawalay trabaho miabot sa dili mokubos sa 50%, kun hapsay natong tin-awon ang pangempleyo. Dili na paigo ang kitaon sa labing nagkadaghan nga mamumuo ug mag-uuma alang sa bugtong kabuhian ug mas naunlod sila sa utang. Anaa ubos sa *poverty line* ang 86% sa katawhan. Mayorya sa kababayan-an ug mga bata nahiagom sa malnutrisyon.

Ang mga naghagong masa nga mga mamumuo ug mag-uuma ug ang hatungang katilingbanong saring nag-antos sa nagasutoy nga



Ang mga panagribal sa mga paksyon sa mga opisyal sa militar ug kapulisan nagsalamin sa mga panagraybal sa mga reaksyonaryong politiko ug nagsilbing mayor nga hinungdan sa nagkasamot nga politikanhong krisis.

mga presyo sa mga batakang panginahanglan, nagakataas nga mga buhis ug balayranan para sa mga batakang katilingbanong serbisyo sama sa tubig, kuryente, pangpublikong transportasyon ug uban pa. Biktima na sa nagakataas nga mga paninglonon sa edukasyon ang kabantan-onan, naglisod pa gyud sila nga makapangita og trabaho. Ang kababayan-an mas subidahon pa ang kahigayonan nga makapangita'g trabaho sulod sa nasud itandi sa kalalakin-an. Busa sila ang naglangkob sa mayorya sa mga Pilipino nga nahimong *overseas contract workers* (OCW).

Ang kawalay ekonomikanhong paglambo ug taas nga tantos sa kawalay trabaho nagduso sa 10% sa populasyon nga mahimong OCW, nga gihikawan og mga katungod sa pag-unyon ug gipugos nga modawat og ubos nga suhol relatibo sa suholan sa mga lumulupyo sa gitrabahoang nasud. Ang kababayan-an mao ang pinakabulnerable sa daghang matang sa pagpangabuso, ilabina kun girekrut sila isip mga tiglingaw ug ubos nga sulugoon.

Wala na ugan'y gihimo ang rehimen aron pagaanon ang ekonomikanhon ug katilingbanong pag-antus sa katawhan, misangpot pa kini sa pagdaot sa dungog sa mga mamumuo sa pagtawag kanila nga mga "terorista" tungod sa pagpraktika nila sa ilang mga katungod sa pag-unyon ug paghingusog og mas maayong suholan ug kondisyones sa panginabuhi. Nagpagarpar kini bahin sa reporma sa yuta apan nagduso og reklasipikasyon sa yutang agrikultural aron dili na kini malangkob sa reporma sa yuta. Ginadasig niini ang labaw'ng konsentrasyon sa yuta sa kamot sa pipila ka korporasyon ug mga pamilya sa agalong yutaan.

Samtang nagkasamot ang ekonomikanhon ug katilingbanong krisis, nagkasamot usab ang politikanhong krisis sa nagharing sistema. Ang managkaribal nga mga politikanhong paksyon sa mapahimuslanong mga hut-ong labaw'ng mihait ang panagtigi kaysa niadto dihang mihiyos ang mga kurakot gikan sa paghupot sa gahum. Nahimong gawi na nila nga magbinutyagay sa isi'g usa sa pagdani og suporta sa publiko taliwala sa katilingbanong diskontento ug kaguliyang.

Nagtunhay ang kusog nga politikanhong panagribal dili lamang tali sa usa ka partidong politikal ug uban pa o kaha tali sa usa ka koalisyon ug uban pa kundili sulod usab mismo sa naghari ug oposisyonistang mga partido ug koalisyon. Kasagaran, ang kompetisyon naghulagway isip panagtigi tali sa mga personalidad ug pamilya sa mapahimuslanong mga hut-ong.

Ingon na lamang ang pagkasiak-siak ug ang pagkabahin sa nagharing koalisyon ni Arroyo sa kompetisyon sa korapsyon, busa si Arroyo mismo nawad-an na kaayo'g kredibilidad ug nahimulag tungod sa kainutil niya nga magpahayag og unsamang katuhan nga palisiya nga makapagaan sa makalolooy nga katilingbanong kahimtang. Busa, sa katapusan sa tuig, gi-anunsyo niya nga dili na siya molansar alang sa pagkapresidente sa 2004.

Seryoso man o dili, ang punto mao nga napugos siya nga maghimo og talagsaong anunsyo nga nagpakita sa iyang huyang nga posisyon sa politika. Sa kamatuoran, napamatud-an nang nagmadaugon ang lapad nga nagkahiusang prente nga gipasiugdahan sa mga ligal nga demokratikong pwersa ug mga oposisyonista sa sulod ug gawas

Ang mga kahimtang sa krisis nagduso sa mga imperyalista ug mga lokal nga reaksyonaryo nga buhian ang kabangis. Apan ang samang mga kondisyones paborable usab sa mga rebolusyonaryong pwersa aron pakusgon ang armadong rebolusyon.



sa iyang nagharing koalisyon sa paghimulag kaniya tungod sa pagka-itoy, korapsyon, kawalay katakus ug pagkamapitulon sa iyang rehimen.

Ang mga panagribal sa mga paksyon sa mga opisyaes sa militar ug kapulisan nagsalamin sa mga panagraybal sa mga reaksyonaryong politiko ug nagsilbing mayor nga hinungdan sa nagkasamot nga politikanhong krisis. Utang-kabubut-on sa mga opisyaes-militar ug -kapulisan ang ilang mga promosyon sa mga isponsor nga politiko busa sayon ra silang malambigit sa mga politikanhong pakigbisog ug sa mga hulga bahin sa mga kudeta ug kontra-kudeta sa pinakataas nga mga ang-ang.

Ang mga pinakadautan sa mga opisyaes sa militar ug kapulisan nakigtigiay sa isi'g usa sa pagpangulo sa mga kriminal nga sindikato nga nagpadagan og pagpasugal, prostitusyon, druga, kidnap-for-ransom, pagpang-ismagol ug uban pa. Ang

pinakaambisyoso kanila nagpresentar isip mga kandidato alang sa pagkapresidente, senador ug kongresman ug lokal nga opisyaes nga ehekutibo. Ang ilang kapital alang sa politikanhong pagpaligon ug kampanyang elektoral naggikan sa kriminal nga mga operasyon.

Ang interbensyon sa US sa ekonomikanhon, politikanhon ug pangmilitar nga mga hisgutanan labaw'ng nabutyag kalambigit sa palisiya ni Bush bahin sa "gubat batok terorismo." Gipahimuslan ug gihimo niining pasumangil ang Septembre 11 nga pagpangataki aron dugang pahugton ang kontrol sa US sa ekonomikanhon ug politikanhong hisgutanan ug pasudlon pag-usab ang mga tropang pangkombat ug mga base militar sa US sa teritoryong Pilipino.

Si Arroyo usa ka baga'g nawong nga itoy sa imperyalismong US. Notoryus siya sa pagduso sa globalisasyon sa "gawasnong merkado" ug pagpahiluna og pro-US nga mga ahente (nga membro sa dili klarong grupo nga gihinganla'g AGILE) sa burukrasya aron paghimo og mga palisiya ug balaud nga pabor sa US ug mga multinasyonal nga korporasyon sa US.

Gigamit sa US si Defense Secretary Angelo Reyes isip *handler* ni Arroyo. Giduso ni Reyes si Arroyo nga paralisahon ug ibasura ang negosasyong kalinaw tali sa GRP ug NDFP ug modeklarar og usa ka palisiya sa tudo-largang gubat batok sa mga rebolusyonaryong pwersa. Giimpluwensyahan usab niya si Arroyo nga mosagop og usa ka anti-teroristang balaud nga gipasunod sa USA Patriot Act, dawaton ang Mutual Logistics Support Agreement (MLSA) ug tugotan ang mga tropa sa US nga mosalmot sa mga operasyong

pangkombat sa Pilipinas.

Anaa nay nakakasa nga mga plano alang sa pag-amyenda sa 1987 konstitusyon sa reaksyonaryong gobyerno aron pagtangtang sa mga nasudnong restriksyon sa mga langyaw'ng pamuhunan ug pagdili sa mga tropang pangkombat ug base sa US dinhi sa Pilipinas.

Naglaom si Speaker Jose de Venecia nga mahimong *prime minister* ubos sa sa sistemang parlamentaryo sa usa ka *constituent assembly* o asembliya para sa pagtibuok sa konstitusyon sa duha ka kamara sa Kongreso¹³. Apan gigalam na sa US si Reyes aron kapulihan si Arroyo. Mas pabor usab ang US sa pagpahigayon sa usa ka kombensiyong konstitusyonal.

Ang mga agent sa CIA ug si Reyes responsable sa pagdasig sa Abu Sayyaf nga mangurso sa paghimo og kidnap-for-ransom ug mga teroristang pagpamomba aron kahataga'g rason ang pagsalmot sa mga tropa sa US sa mga operasyong pangkombat batok sa mga rebolusyonaryong pwersa sa PKP ug sa MILF.

Gipasamot na ni Reyes ang mga mapanumpuonang kampanyang militar batok sa mga rebolusyonaryong pwersa sukad niadtong 2001, busa gipadayon ubos sa rehimeng Arroyo ang palisiyang tudolargang gubat nga giduso niya ubos sa rehimeng Estrada. Responsable usab siya sa paglapas sa kasabutang hunong-buto tali sa GRP ug MILF. Ubos siya karon sa pagtambag sa mga eksperto sa saywar sa US CIA aron magmugna og kasamok ug dayon molansar alang sa pagka-presidente ug nagpresentar isip isog nga tawo nga mag-uli sa kahusay.

Hingpit ang pag-uyon ni Arroyo sa US ug kang Defense

Secretary Angelo Reyes sa paghingusog sa kapitulasyon sa NDFP. Ang ilang komon nga katuyoan mao ang pagbasura sa negosasyong kalinaw tali sa GRP ug NDFP bunga sa siguradong pagbalibad sa NDFP nga mosurender pinaagi sa pag-uyon sa usa ka "final peace agreement" nga makausa-ka-bahin nga gigambalay sa GRP.

Para ibasura ang negosasyong kalinaw tali sa GRP ug NDFP, nakigkunsabo ang GRP sa gobyernong US aron ilakip ang Partido, BHB ug sa *chief political consultant* sa NDFP diha sa talaan sa mga "terorista" ug pagpangampanya nga sundon kini sa uban pang mga gobyerno (Britain, Canada ug Australia) ug sa Council of the European Union. Katuyoan sa GRP nga hasion ang *negotiating panel* sa NDFP ug himuong lisod ang pagpahigayon sa negosasyong kalinaw tali sa GRP ug NDFP.

Gisunod ni Arroyo ang mando sa imperyalismong US nga dugang



**Anga'ng palambuan nato
ang atong lig-ong kontrol sa
matag estratehikong erya sa
matag rehiyon ug matag
mayor nga isla.
Kinahanglang mapunting
nato kining mga
stratehikong eryaha ug
itaho kini ngadto sa mga
taas nga organo.**

pakusgon ang armadong kontra-rebolusyon sa ngalan sa kontra-terorismo. Wala niya tagda ang kamatuoran nga ang mga kampanyang militar sa pagpanumpo nga giprayoritisa batok sa 12 ka natarang gerilya sa BHB sukad pa niadtong 2001 napakyas pagsanta sa pag-asdang sa rebolusyonaryong kalihukan. Walay pulos siyang naglaom nga makalansar sa pagka-presidente kun maguba niya ang Bagong Hukbong Bayan.

Nahikalimtan na ugaling sa US ug mga itoy niini sa Pilipinas nga ang armadong rebolusyonaryong kalihukan mikusog luyo sa pagtunhay sa pasistang dikta-duryang Marcos sulod sa 14 ka tuig ug pagpahimulos niini sa presensya sa mga base militar sa US kundiin ang itoy nga rehimen midawat og dagkong mga suplay militar ug ayudang pangpinansya.

Kun tugkaron, pinaagi sa pagpahamtang kanila og dugang pagpamitol ug paghulga og bagong paghari sa dayag nga teror, gitukmod sa US ug mga itoy niini ang katawhang Pilipino ug mga rebolusyonaryong pwersa nga pakusgon ang armadong rebolusyon.

Ang mga kahimtang sa krisis nagduso sa mga imperyalista ug mga lokal nga reaksyonaryo nga buhian ang kabangis. Apan ang samang mga kondisyon paborable usab sa mga rebolusyonaryong pwersa aron pakusgon ang armadong rebolusyon.

4. PATAS-ON ANG ANG-ANG SA GUBAT SA KATAWHAN

Tungod mismo sa nagsulabing krisis sa pangkalibutang sistemang kapitalista ug lokal nga nagharing sistema, ang gimandoan-sa-US nga rehimeng Arroyo desperadong

misagop sa usa ka palisiya sa larga-tudong gubat ug nag-imbatar sa interbensiyong militar sa US nga nagtakuban nga "gubat batok terorismo" sa pagsulay'ng hasion ang mabagang masa sa katawhan.

Apan niining bag-ohay lamang nga Plenum sa Komite Sentral sa Partido Komunista sa Pilipinas, naggambalay og Tulo-ka-Tuig nga Plano alang sa 2003-2005 aron patas-on ang ang-ang sa gubat sa katawhan ug kab-uton ang malukpanong mga pag-asdang sa rebolusyon. Gihimo kini matapos makasumada ug nakakutlo og mga pagtulun-an sa nangaging Tulo-ka-Tuig nga Plano alang sa 1999-2002, sa paggiya sa Marxismo-Leninismo-Maoismo ug sa Ikaduhang Bantugang Kalihukang Pagtul-id sa partikular.

Ang kinatibuk-ang tumong sa plano mao ang lig-on nga pagsukol ug pagpakyas sa nagkakusog nga mga ataki sa rehimeng US-Arroyo ug i-asdang ang demokratikong rebolusyon sa katawhan ngadto sa bag-o ug mas taas nga ang-ang.

Ang mga nag-unang tumong mao ang:

1) Dugang palapdon ug pakusgon ang anti-imperyalista, antipyudal ug antipasistang pakigbisog. Ihimulag ug lumpagon ang rehimeng US-Arroyo. Suklan ang nagkakusog nga interbensiyong militar sa US ug terorismo sa estado.

2) Paabton ang mga natarang gerilya ngadto sa mayorya nga mga munisipalidad, ilabina sa mga estratehikong bahin sa kapupud-an. Iladlad ang mga rekisitos aron maabot ang hatungang yugto sa estratehikong dependensiba pinaagi sa labaw'ng pagpalapad ug pinaagi sa mas

Atubangon nato ang problema sa mga manggugubat nga miluwat sa hukbo. Kinahanglan natong tumanon ang mga sukaran sa pagrekrut, ilunsad ang gimbuhatong pangpolitika sa han-ay sa mga manggugubat, tabangan sila nga makasugakod sa mga kalisdan ug problema ug batokan ang pagpamenos sa mga bag-ong rekrut.



bug-at nga pagtagad sa binalud-balod nga konsolidasyon sa matag munisipalidad. Pakusgon ang gerilyang pakiggubat, palapdon ug paspasan ang lakat sa rebolusyong agraryo, ug palig-onon ang katakus sa baseng masa sa organisasyon, politika, ekonomiya, depensa ug kultura.

3) Huptan ang pagpangulo sa Partido sa BHB ug sa armadong rebolusyon. Agnihon ang minilyon-milyong katawhan sa armadong rebolusyon pinaagi sa palisiya ug mga taktika sa nagkahiusang prente. Palapdon ug palig-onon ang pakigrelasyon ug pakigtinabangay sa tanang posibleng kaalyado.

4) Palig-onon ang Partido sa ideolohiya, politika ug

organisasyon. Ipakaylap ang Marxismo-Leninismo-Maoismo. Ipadayon ang bag-ong-demokratikong rebolusyon. Ilunsad ang kampanya alang sa pagrekrut sa Partido sa katuyoang makakab-ot og gatasan ka libong mga membro sa Partido.

Tukuron ang mga natarang gerilya

Kinahanglan natong tukuron ang mga natarang gerilya sa mayorya sa mga munisipalidad ug padaghanon og 20% ang nagtunhay'ng ihap. Kinahanglang kab-uton ang kusog-kompanya sa BHB sa matag natarang gerilya. Kinahanglang konsolidahon ang platun isip sentro de grabidad sa matag munisipalidad sa natarang gerilya.

Ang mga rehiyong naulahi sa hisgutanan sa armadong kusog angay'ng matabangan sa tulo ka pamaagi: dugang pagtagad ug paggiya gikan sa sentro, dugang suporta gikan sa kasyudaran sa hisgutang kadre, propaganda ug pagpalagsik sa kalihukang masa ug matngong suporta gikan sa mga kusog nga rehiyon.

Sa kadaghanan sa mga rehiyon, nanginahanglan gyud kita og dili mokubos sa unom ka mga natarang gerilya, nga matag usa anaay kusog kompanya. Sa matag natarang gerilya nga anaay kusog kompanya, angay'ng magpalambo kita og tulo o kapin nga magkanait nga pito ka konsolidadong kabaryohan sa paborableng tereyn.

Angay'ng ibase ang atong pagpalapad sa konsolidasyon. Kinahanglan nga maayo kita sa pagkonsolida ug magpalambo sa mga natarang gerilya aron makamugna og pangpolitika ug pangmilitar nga kusog ug katakus nga makatukod og dugang pang

mga natarang gerilya. Sa samang higayon, kinahanglan nga maksimisahan nato ang suporta gikan sa kasyudaran ug uban pang mga sentrong kalungsoran sa hisgutanan sa kadre gikan sa han-ay sa mga mamumuo ug edukadong kabatan-onan, propesyonal ug teknikal nga kahanas ug materyal nga hinabang. Angay'ng hatagan og pagtagad ang pagsumpay sa mga natarang gerilya ug pagpalambo og mga linikuray nga relasyon (*back-to-back relations*) aron maksimisahan ang pagtinabangay. Kinahanglang pangandaman nato ang paglambo sa mga istableng baseng erya gumikan sa pagsumpay sa pila ka mga natarang gerilya. Angay'ng palambuan nato ang atong lig-ong kontrol sa matag estratehikong erya sa matag rehiyon ug matag mayor nga isla. Kinahanglang mapunting nato kining mga estratehikong eryaha ug itaho kini ngadto sa mga taas nga organo.

Ang usa ka natarang gerilya mabahin sa usa ka baseng gerilya ug mga sonang gerilya. Ang platun isip sentro de gravedad nagbase sa baseng gerilya. Kini ang pinakakonsolidado nga erya sa natarang gerilya tungod sa mas makuti nga gimbuhatong masa sulod niining nilangkuban. Ang platun o kaha mga platun, nga mabahin-bahin sa mga iskward o kaha mga armadong tim pangpropaganda, depende sa kahimtang o tumong, nagbase sa mga sonang gerilya nga adunay lapad nga linangkuban lapas sa baseng gerilya. Ang mga sonang gerilya mao ang dili kaayo konsolidado nga bahin sa natarang gerilya.

Mahimong makasugod ang usa ka platun sa pagtukod sa usa ka natarang gerilya. Naglunsad kini og gimbuhatong masa, nagtukod ug nagbansay sa milisyang bayan

ug naglunsad og mga taktikal nga opensiba aron makakab-ot og mga dugang pusil aron abton ang kusog kompanya.

Kinahanglang subayon ug makuting tun-an ang Campaign Bantay Laya sa kaaway aron epektibo natong mapakyas kini. Kinahanglang detalyadong tun-an ang kasinatian sa unsamang magkanait nga mga baryo nga dugay'ng nahuptan sa *special operations teams* sa kaaway, puntingon ang mga suliran ug mga lakang aron masulbad kini.

Padak-on ug palig-onon ang hukbo sa katawhan

Angay natong palambuan ang platun isip bata kang pormasyon. Kinahanglan nga magpakamaayo kita sa pagpangulo ug pagpadagan sa platun isip sentro de gravedad sa mga natarang gerilya ug rehiyon. Kakuyog sa rehiyonal nga komite sa Partido, ang rehiyonal nga *operations command* angay'ng magbaton og usa ka platoon, gipadakong platun o kaha kompanya isip sentro de gravedad sa rehiyonal nga ang-ang.



Gitudlo kanato sa 34 ka tuig sa armadong pakigbisog ang daghan kaayong mg taktika sa pagpilde ug pagdisarma sa mga bahin sa armadong pwersa sa kaaway.

Pauswagon nato ang pagrekrut ug pagbansay sa mga manggugubat. Kinahanglan natong tumanon ang mga rekisitos sa edad, politika, organisasyon ug kahimsog sa panghunahuna ug panglawas. Angay kitang morekrut og dugang pang mga mamumuo ug edukadong kabatan-onan ug ikombina sila'g maayo sa mga manggugubat nga gikan sa hutong mag-uuma. Bansayon nato ang dili mokubos sa 25% sa atong mga Pulang manggugubat nga mahimong opisyal sa nagkalain-laing ang-ang. Kinahanglang magpalambo kita og pormal nga kurso alang sa pagbansay-opisyal.

Himuan natong sistematiko ang politiko-militar nga pagbansay sa lapad nga linangkuban. Maggahin kita'g panahon sa paglunsad og mga regular nga drills sa pagdagan sa atong mga gimbuhaton. Palig-onon nato ang pagpangulo sa Partido ug maglunsad og lagsik nga gimbuhatong pangpolitika sa hukbo. Ipasiugda nato ang pangkinatibukang politikanhong edukasyon ug ang bata kang kurso sa Partido, ang demokrasya sa tulo ka natad ug ipasiugda ang disiplina ug timwork.

Atubangon nato ang problema sa mga manggugubat nga miluwat sa hukbo. Kinahanglan natong tumanon ang mga sukaranan sa pagrekrut, ilunsad ang gimbuhatong pangpolitika sa han-ay sa mga manggugubat, tabangan sila nga makasugakod sa mga kalisdanan ug problema ug batokan ang pagpakamenos sa mga bag-ong rekrut.

Angay'ng hataga'g pagtagad sa Komite Sentral sa Partido ug Rehiyonal nga Komite sa Partido ang mga hisgutanan militar. Matag karon ug unya, kinahanglang aseson ug balansehon ang gimbuhatong militar ug mga

hisgutanang bahin niini aron magiyahan ang Partido ug hukbo sa ilang mga kongkretong tahas, paspas nga maatubang ang mga pagbag-o sa kahimtang ug mga lihuk ug taktika sa kaaway, ug sulbaron kini gilayon.

Angay natong tun-an ang teoryang militar, maghimo'g panukiduki ug sulbaron ang mga problema sa estratehiya ug taktika. Kinahanglan natong palig-onon ang sistema sa komand. Angay natong palagsikon pag-usab ang nasudnon ug rehiyonal nga mga operations command. Angay'ng mahatagan og prayoridad ang pagplano, pagbansay, espesyal nga mga operasyon, paniktik, ordnans, lohistika ug mga panginahanglang medikal.

Tukuron nato ang sanga sa Partido sa ang-ang platun ug ang grupo sa Partido sulod sa iskwad. Kinahanglang dumalaan sa Instruction Bureau ang pangkinatibuk-ang politikanhong edukasyon ug edukasyon sa Partido samtang ang Politico-Military School angay'ng maglunsad og politiko-militar nga pagbansay. Maglunsad kita og mas makanunayon nga mga komperensyang politiko-militar aron mas malukpanong makabinayloay og mga paglantaw ug kasinatian.

Angay natong pakusgon ang sistema sa pagtaho, pagsumada ug ebalwasyon sa mga taktikal nga opensiba. Mahinungdanon kaayo sa propaganda nga mataho nato gilayon sa katawhan ang atong mga kadaugan sa natad sa panggubatan.

Kinahanglan nga mahataga'g pagtagad sa mga nasudnon ug rehiyonal nga ang-ang sa komand ang mga yaweng panagsangka, espesyal nga mga operasyon, mga koordinadong operasyong nahasubay sa mga direktiba sa mga taas

Kinahanglan nga ddepensahan nato ang katawhan sa pagyatak sa mga tropa sa US sa nasudnong soberanya ug sa teritoryo sa demokratikong gobyerno sa katawhan. Kinahanglan nga andam natong sukulan ang interbensyon ug pagpanulong militar sa US.



nga organo, sama sa Komite Sentral, Politburo, Komisyong Militar, Komiteng Tigpatuman ug Rehiyonal nga Komite sa Partido.

Kinahanglan nga makapadaghan kita sa armadong kusog sa hukbo sa katawhan nag-una pinaagi sa mga taktikal nga opensiba. Aron dugangan kini, mahimo kitang maggama og pila ka armas ug mahimo usab kita nga mopalit pinaagi sa mga higala ug negosyante.

Angay'ng seryoso natong tukuron ang milisyang bayan isip lokal nga kapulisan nato ug isip dugang ug reserbang pwersa sa mga pultaym nga yunit sa hukbo sa katawhan. Mahimo kitang magbansay og dili mokubos sa usa ka platun matag baryo sa natarang gerilya sa gimbuhaton nga pangpolis ug pangsulod nga seguridad.

Kinahanglan usab natong agnihon ang mga organisasyong masa nga tukuron ang mga yunit sa kaugalingong depensa ug bansayon ug tudloan sila sa mga

pamaagi sa pagsurbeylans sa kaaway ug sa gimbuhaton sa transportasyon ug komunikasyon, taliwala sa mga kampanyang pagpanumpo sa kaaway.

Angay'ng makaplastar kita og kaylap ug aktibong kutay paniktik pinaagi sa pagmobilisa sa masa. Kinahanglan nga maayo kita sa pagsurbeylans ug pagsuta sa kutay paniktik sa kaaway aron bungkagon kini. Kinahanglan nga himuong sistemado ang pagtaho, pagsusi, ebalwasyon ug pagkonso-lida sa natigom nga mga impormasyon.

Angay'ng mahimong maayo ang hukbo sa katawhan sa gimbuhatong seguridad, pagmentinar sa pagkasekreto ug pagpakyas sa mga laraw ug ataki sa kaaway. Kinahanglan nga kanunay kitang matngon sa mga lagda bahin niini ug tumanon kini. Angay natong likayan nga madepensiba kun maglunsad ang kaaway og kaugalingong mga taktikal nga opensiba batok kanato.

Angay natong tukuron ang mga yunit sa armadong partisano sa kasyudaran gikan sa han-ay sa mga Pulang manggugubat nga naglihok na sa BHB sulod sa dili mokubos sa duha ka tuig ug hanas sa syudad kundiin sila gi-asayn. Sa panahong wala mangandam o naglunsad og taktikal nga opensiba sa syudad, ang mga armadong partisano sa syudad kinahanglang magbase sa kabanikanhan.

Pakusgon ang mga taktikal na opensiba

Aron pagseguro nga ang armadong rebolusyon lapad ug lalom nga nagbase sa katawhan, ang hukbo sa katawhan nagtagana og 90% sa panahon niini sa gimbuhatong pangpolitika ug 10%

sa mga taktikal nga opensiba.

Ang nag-unang platon, isip sentro de grabidad sa usa ka natarang gerilya, angay'ng manglimbasog nga makalunsad og usa ka taktikal nga opensiba matag tulo ka bulan. Ngadto niini, kinahanglang maghimo og pasiunang gimbuhatong paniktik sa duha hangtud tulo ka mga posibleng target. Dayon, pilion nato ang pinakasayong targeton pinaagi sa ambus o kaha reyd. Ang mga rehiyonal nga operations command mahimong direktang maglunsad og sa kasarangan usa ka taktikal nga opensiba matag tulo ka bulan pinaagi sa paghanyay sa mga pwersa alang sa ambus o reyd o kaha sa pagkoordinar sa mga opensiba nga ilunsad sa mga natarang gerilya ubos sa komand niini. Bisan pa niana, dili angay nga ibutang sa peligro sa unsamang rehiyonal nga organisasyon sa hukbo o natarang gerilya ang duha-ka-katloan (2/3) o kapin pa sa kinatibuk-ang armadong kusog niini sa usa ra ka panagsangka.

Kinahanglang maglunsad og usa ka taktikal nga opensiba matag upat ka bulan ang mga platon nga gi-asayn sa armadong gimbuhatong propaganda o gimbuhatong masa. Ang kasunsunon mahimong dugangan pa base sa mga miaging kadaugan.

Ang mga taktikal nga opensiba angay'ng madesisyonan ug malunsad aron palig-onon ang armadong rebolusyon ingon man sa paghatag-inspirasyon sa katawhan nga mosalmot o kaha mosuporta niini. Ang mga bata kang taktikal nga opensiba angay'ng ilunsad aron makasakmit og mga armas sa kaaway ug ang mga espesyal nga taktikal nga opensiba angay'ng ilunsad sa sukaranan sa haom nga mga mando sa usa ka korte sa katawhan

o kaha sa haom nga otoridad pangpolitika aron arestuhon o kaha pakigsangkaan ang mga tiglapas sa tawhanong katungod, mga dagkong kawatan ug mga traydor nga adunay utang-dugo ug nakabuhat og grabing pagpangawat sa mga pundo ug uban pang kabtangan sa rebolusyon.

Kinahanglang nga iplastar nato og maayo ang hukbo sa katawhan alang sa gerilyang pakiggubat. Angay natong pleksibleng gamiton ang mga taktika sa konsentrasyon, pagkatag ug pagbalhin. Gikonsentra nato ang atong pwersa alang sa paglunsad og usa ka opensiba. Gikatag nato ang atong pwersa aron paglunsad og gimbuhatong masa. Gibalhin nato ang atong pwersa aron paglikay sa opensiba sa usa ka superyor nga pwersa sa kaaway.

Kinahanglang natong diskubrihon ang mga oportunidad alang sa mga taktikal nga opensiba pinaagi sa obserbasyon ug paniktik. Mahimo usab natong mugnaon ang naingong mga oportunidad pinaagi sa paghaylo sa kaaway nga makahimo og mga



**Angay'ng dugangan nato
ang organisadong baseng
masa og 30 hangtod 40%
matag tuig sulod
sa mosunod nga tulo
ka tuig. Angay'ng
organisahan nato ang
gatusan ka libong katawhan
sa tanang rehiyon.**

kasaypanan. Sa unsamang kahimtang, kinahanglang nga planuhon ug ilunsad lamang kadtong mga taktikal nga opensiba nga makapaniguro kita nga modaog.

Gitudlo kanato sa 34 ka tuig sa armadong pakigbisog ang daghan kaayong mga taktika sa pagpilde ug pagdisarma sa mga bahin sa armadong pwersa sa kaaway. Mahimo kita nga mangreyd o mangambus sa gagmay'ng mga yunit sa kaaway. Malagmit dili nato kayahon nga reydon ang mga dagko ug maayong pagkatrinserang kampo apan kayahon nato nga hulaton ang usa ka gamay nga yunit nga mogawas ug moagi sa atong ambusanang dapit.

Mahimo natong pukanon o kaha i-haras ang usa ka yunit sa kaaway gigamit ang atong gamay'ng pwersa sa usa ka dapit, samtang nag-atang ang usa ka mas dakong pwersa sa usa pa ka lugar aron banhigan ang reimporsment o kaha yunit kaaway nga magimbestigar. Mahimo natong huptan o liyokan ang usa ka lugar gigamit ang usa ka platon o kompanya aron ipatuman ang taktikal nga opensiba o kaha unsa pa mang misyon nga nanginahanglang og kontrol sa perimetro sa lugar.

Human kita makadaog og pila ka mga taktikal nga opensiba sa usa ka erya, malauman nato ang kaaway nga magbuhi og kaugalingon niining kontra-opensiba. Mahimong mubo o lungtad kini. Mahimo natong likayan ug aribahan ang usa ka opensiba sa kaaway nga mubo ang gidugayon. Kun lungtad ug lapad ang opensiba sa kaaway, kinahanglang nga mobalhin kita sa ubang lugar.

Sa higayong gisangkad na sa kaaway ang mga pwersa niini pinaagi sa pag-akupar sa dako kaayong bahin sa teritoryo, mahimo natong pilion ang mga

huyang nga bahin sa samang erya alang sa atong mga pag-ataki gikan sa mga eksteryor nga linya o kaha, kun tugutan sa higayon, sulod sa interyor nga linya sa kaaway. Ang target, mahimong usa ka gamay nga detatsment nga nakapundo o kaha malihukon.

Mahimong dugangan sa BHB ang mga armas niini ug patas-on ang ang-ang sa iyang taktika ug teknika pinaagi sa bugtong nga paglunsad ug pagdaog sa mga taktikal nga opensiba batok sa mga pwersa sa kaaway. Sa dugang pagdako sa BHB, ang atong mga Pulang komander ug manggugubat mahimong makapalambo sa ilang kahanas sa pakigsangka ug mga instrumento ug makadani og mga bag-ong rekrut nga makadala og propesyonal ug teknikal nga kahanas nga mapuslanon sa armadong rebolusyon.

Angay'ng mahimo kitang alerto sa interbensyong militar sa US. Kinahanglan nga depensahan nato ang katawhan sa pagyatak sa mga tropa sa US sa nasudnong soberanya ug sa teritoryo sa demokratikong gobyerno sa katawhan. Kinahanglan nga andam natong suklan ang interbensyon ug pagpanulong militar sa US.

Sukad sa pagkapilde niini sa Indochina, nagmadaugon ang US sa pag-ataki ug paglumpag sa mga langyaw'ng gobyerno pinaagi sa paggamit og mga *high-tech* nga armas ug mga taktikang *blitzkrieg* (kinilab nga pag-asolt). Ning bag-ohay lamang, buot sa US nga gamiton ang Pilipinas isip nataran sa pagtesting ug pagmostra sa armadong kusog niini batok sa usa ka rebolusyonaryong kalihukan nga naglunsad og malungtarong gubat sa katawhan.

Sa pagsukol sa imperyalismo,

**Sa pagbaton nato
sa kaugalinong
organisadong baseng masa
nga gipangulohan
sa Partido, mahimo natong
gamiton ang palisiya
ug taktika sa nagkahiusang
prente aron pukawon,
organisahan ug mobilisahan
ang minilyon-milyong
katawhan sa pinakapaspas
nga posibleng pamaagi.**



misandig kita sa pangkinatibukang linya, estratehiya ug taktika ug bahandianong kasinatian. Dugang pa niini, subli natong gitun-an ang nagmadaugong mga rebolusyonaryong pakigbisog sa mga kauban ug katawhang Tsino, Koreano ug Vietnamese sa pagpangibabaw sa interbensyon ug pagpanulong sa US.

Sa pakigsangka sa kaaway, ang atong nag-unang palisiya mao ang pagpukan sa iyang mga pwersa. Sa samang higayon, anaa kita'y sekondaryong palisiya sa pagbungkag sa naingong mga pwersa pinaagi sa pagdani kanila nga mobiya gikan sa kaaway o kaha makig-abin sa rebolusyon. Kinahanglan nato ang usa ka espesyal nga organo ug mga espesyal nga operatiba aron pagpahiluna o pagpalambo sa mga patriyotiko ug progresibong elemento mismo sa sulod sa

reaksyonaryong hukbo ug kapulisan. Angay natong palambunon ang usa ka demokratikong kalihukan sa ilang han-ay. Kinahanglang makabaton kita og estratehikong paglantaw bahin niini.

Sa kalihukang masa, angay'ng mahatagan nato og pagtagad nga maabot ang mga kasundalohan sa reaksiyonaryong hukbo ug ilang mga kapamilyahan. Kinahanglan mahatagan nato og kooperasyon ang mga biktima sa pagpangabuso sa mga opisyal, korapsyon ug paglapas sa tawhanong katungod sulod sa reaksiyonaryong hukbo ug kapulisan.

Kinahanglan nga nyutralisahan ang lokal nga kapulisan ug CAFGU sa matag kahigayonan. Angay'ng mangita kita og mga pamaagi sa pagdisarma kanila nga wala o wala kaayo'y magbanaw nga dugo. Apan sa kaso sa reaksiyonaryong hukbo, mahimong gamiton nato ang tanang panginahanglanong taktika aron pildehon sila diha sa natad sa pakigsangka.

Kinahanglan nga malumo natong tagdon ang mga dinakpan nga kaaway nga sundalo ug pulis, tahuron ang ilang tawhanong katungod ug hatagan sila'g makatawong pagtratar. Gitratar nato sila isip mga dinakpan sa gubat (POW) nahasubay sa Geneva Convention ug mga protokol niini ingon man sa GRP-NDFP Comprehensive Agreement on Respect for Human Rights and International Humanitarian Law.

Mahimo nga buhian nato ang mga ordinaryong sundalo ug pulis sa pinakadaling panahon. Kinahanglan nga iditinar nato ang mga opisyal sa kaaway hangtud sa panahon nga ang gobyerno nila ug ang NDFP magkayuon sa kongkretong pamaagi sa luwas ug husay nga pagbuhi

kanila.

Gimbuhatong masa ug nagkahiusang prente

Angay natong pukawon, organisahon ug mobilisahon ang minilyon-milyong katawhan. Kinahanglan nga mahimo nato kini pinaagi sa mainantusong gimbuhatong masa ug pulidong pag-organisa sa masa ingon man sa paghimo og mga kasabutan sa mga kaalyado, lapad (*sweeping*) nga pangmasang propaganda ug mga mobilisasyon nga mahimong makadani sa masa nga nahasubay sa linya sa nagkahiusang prente.

Angay'ng dugangan nato ang organisadong baseng masa og 30 hangtud 40% matag tuig sulod sa mosunod nga tulo ka tuig. Angay'ng organisahon nato ang gatusan ka libong katawhan sa tanang rehiyon. Angay'ng abton nato ang bag-ong pungkay sa pulidong pag-organisa sa masa.

Kinahanglan nga tukuron nato ang komiteng tig-organisa sa baryo isip pangandam sa komiteng rebolusyonaryo sa baryo, ang mga komiteng tig-organisa sa nagkalain-laing matang sa organisasyong masa, ang mga organisasyong masa, ang milisya, ang mga yunit sa kaugalingong depensa sa mga organisasyong masa ug ang mga sanga sa Partido sa magkanait nga mga baryo ug lungsod.

Ang matag iskward sa BHB kinahanglang makatukod og 15 hangtud 20 ka grupong tig-organisa matag bulan. Ang mga grupong tig-organisa angay'ng mapalambo ngadto sa hingpit nga organisasyong masa sulod sa usa ka tuig ug ang mga komiteng tig-organisa, ngadto sa mga hingpit nga organisasyong masa sulod sa unom ka bulan.

Kinahanglang maningkamot kita nga mamentinar ang ratio nga 3:1 sa pagpalapad ug konsolidasyon. Sa pagplano sa gimbuhaton nato sa erya, kinahanglan natong ikonsidera kun ang erya makahatag og igo-igong luna alang sa pagmaniobra ug anaay paborableng tereyn. Angay'ng mas paspas ang pag-organisa sa masa sa kabaryohan nga daan na nating gilihukan kun masulbad na ang mga problemang nakapugos kanato nga mopahawa.

Kinahanglan nga matukod nato ang komiteng tig-organisa sa baryo¹⁴ ug pinakadaghang posibleng komiteng tig-organisa sa nagkalain-laing matang sa mga organisasyong masa aron malangkob ang tibuok baryo ug makiglambigit sa tanang demokratiko ug progresibong elemento. Ang rebolusyonaryong komite sa baryo nagbarog isip organo sa politikanhong gahum nga pinili sa mga representante sa mga organisasyong masa o kaha, kun tugutan sa kahigayonan, direkta

kining gipili sa katawhan sa baryo.

Kinahanglan nga tukuron nato ang komiteng munisipal sa unsamang matang sa organisasyong masa kun ang naingong organisasyong masa organisado na sa 15 hangud 20 ka baryo sa usa ka munisipalidad. Sa takdang panahon, mahimo natong tukuron ang mga komite sa ang-ang distrito ug probinsya.

Ang mga organisasyong masa kinahanglan nga maglunsad og mga kampanya aron mobilisahon ang katawhan alang sa ilang kaugalingong benepisyo ug iplatar ang sukaranan sa dugang pagrekrut ug dugang mobilisasyon. Pinaagi sa pakigtinabangay sa mga organisasyong masa, ang mga armadong tim pangpropaganda angay'ng maglunsad og kaylap nga politikanhong edukasyon. Angay'ng magbansay og dugang pang mga instruktur sa han-ay sa masa. Kinahanglang padasigon sila nga mamugnaong gamiton ang mga nagtunhay'ng epektibong pamaagi ug instrumento sa edukasyon.

Kinahanglan palapdon ug palagsikon nato ang antipyudal nga pakigbisog. Angay'ng i-asdang nato ang minimum nga programa sa reporma sa yuta. Agdahon nato ang mga asosasyong mag-uuma nga ipadayon ang kampanya aron pakunhuran ang abang sa yuta, paubsan ang interes sa utang, patas-on ang suholan sa mga mamumuong panguma, patas-on ang presyo sa mga produkto ug pausbawon ang produksyong agrikultural ug mga panapar nga trabaho (*sideline occupations*).

Kinahanglan nga suklan nato ang paghibalik sa yuta ngadto sa mga agalong yutaan, mga minî nga kooperatiba, ang reklasipikasyon sa yuta ug reklasipikasyon sa mga tanom, agrikultural nga



**Sa tumang pagsalig,
mainantuson nga molihuk
ug makigbisog kitang tanan
aron patas-on ang ang-ang
sa gubat sa katawhan
ug kab-uton ang
malukpanong mga pag-
asdang sa bag-ong-
demokratikong rebolusyon.**

"globalisasyon," usura sa mga komersyante, nagkalain-laing pamaagi sa pag-ilog og yuta ug uban pa. Kinahanglang pugngan ang reaksyonaryong gobyerno sa pag-ilog sa yuta nga daan nang nahatag o gidatadatahan na sa daang mga saop.

Kinahanglan nga maglunsad kita og uban pang matang sa kampanyang masa nga may kalabutan sa mosunod: politikanhong edukasyon, organisasyon, produksyon, panglawas, literasiya, kultura, pagbansay sa pagdepensa sa kaugalingon, tawhanong katungod, pangandam sa mga natural ug hinimoan-sa-tawo nga katalagman ug uban pa. Angay'ng dalhon nato sa kabanikanhan ang unsamang kahanas ug hinabang nga mahimong makuha nato sa kasyudaran.

Kinahanglan nga palig-onon nato ang alyansa sa mamumuo ug mag-uuma isip base sa nagkahiusang prente alang sa armadong rebolusyon. Angay'ng nag-unang nagsalig ang Partido ug BHB sa kabus nga mga mag-uuma

ug mamumuong panguma, danihon ang mga hatungang mag-uuma, nyutralisahon ang adunahang mga mag-uuma ug pahimuslan ang mga kontradiksyon tali sa nahilamdagan ug despotikong mga agalong yutaan aron ihimulag ug gub-on ang gahum sa naulahi.

Dugang pa niini, kinahanglan nga palambuon nato ang pakig-alyansa sa mga progresibong pwersa sa petiburgesya sa kasyudaran, ang pakig-alyansa sa mga patriyotikong pwersa sa hatungang burgesya ug ang dili istable nga pakig-alyansa diha sa mga seksyon sa reaksyonaryong mga hut-ong batok sa kaaway.

Sa pagbaton nato sa kaugalingong organisadong baseng masa nga gipangulohan sa Partido, mahimo natong gamiton ang palisiya ug taktika sa nagkahiusang prente aron pukawon, organisahon ug mobilisahon ang minilyon-milyong katawhan sa pinakapaspas nga posibleng pamaagi. Busa mahimo natong ikoordina sa pinaka-epektibong pamaagi ang mga

pwersa ug katawhan sa mga erya sa kasyudaran ug kabanikanhan.

Kinahanglang makapahimugso kita og sinuportahay ug pakigtinabangay (*mutual support and assistance*) tali sa kabanikanhan ug kasyudaran. Ug angay'ng gamiton nato sa labing epektibong pamaagi ang ligal, semiligal ug ilegal nga mga dagway sa organisasyon ug pakigbisog alang sa pagpalapad ug konsolidasyon.

Sa tumang pagsalig, mainantuon nga molihuk ug makigbisog kitang tanan aron patas-on ang ang-ang sa gubat sa katawhan ug kab-uton ang malukpanong mga pag-asdang sa bag-ong-demokratikong rebolusyon. Kab-uton nato ang mga target sa bag-ong Tulo-ka-Tuig nga Plano ug magtala og dagkong mga kadaugan sa mosunod nga tulo ka tuig. Himuon nato kutob sa maabot nga makatampo sa pagpaasdang sa pangkalibutang proletaryong rebolusyon ug sa lapad nga anti-imperyalistang kalihukan. **AB**

PANAPOS NGA MGA NOTA:

¹Sa kasaysayan sa kapitalistang sistema, ang taas nga pangempleyo kanunay'ng nagresulta sa pagtaas sa suholan tungod kay ang taas nga *demand* alang sa mga mamumuo maoy nagbutang kanila sa maayo nga kahimtang nga ihingusog ang dugang suholan. (*pahina 5*)

²Sa baligyaanan sa mga sapi sa US, mahimong mopalit og mga sapi sa pamaaging *on margin* o kaha pinaagi sa utang nga adunay paggarantiyang kolateral nga ideposito sa mga *stock broker*. Ang mga mopalit *on margin* mahimong makautang og duha hangtud upat ka pilo sa bili sa kolateral nila aron magamit sa pagpalit og mga sapi pinaagi sa samang *stock broker*. Kun mohugno ang presyo sa mga sapi og mas ubos pa kaysa sa kantidad sa utang, mahimong ibaligya na sa *stock broker* ang mga sapi, embarguhon ang bili niini ug sa kolateral hangtud sa kantidad sa utang, ug maningil pa og interes sa utang. (*pahina 5*)

³*Consumer demand* o ang kinatibuk-ang bili na mamahimong paliton sa mga konsyumer subay sa ilang katakus na pumalit (*pahina 5*)

⁴Ang *salient points of control* maoy mahinungdanong mga nataran o kaha teritoryo nga kun makontrol, naghatag sa usa ka dapig sa panagbangi aron gumikan dinhi, mamahimong makontrol o maimpluwensyahan ang mas langkob o mas estratehikong nataran o teritoryo. Sa ingon niining kahulogan, ang pagposisyon sa US sa Iraq naghatag sa US og *salient point of control* sa pagsulod sa kinatibuk-an sa Middle East. (*pahina 6*)

⁵Ang *cluster bomb* maoy usa ka dakong bomba nga nag-unoran og gatusan ka gagmay'ng mga bomba

(miabot sa 200-600) nga sabwag nga naglangkob sa lapad nga kayutaan ug nagdulot og sangkad nga kadaot. Ang katuyoan niini mao ang dinaghang pagpamatay ug pagpanggun-ob sa mga lugar nga nagdasok sa mga tawo. Gisugyot sa mga tigpaluyo sa tawhanong katungod ug makatawo nga gubat nga ideklarar isip iligal nga armas alang sa dinaghang pagpanggun-ob ang cluster bomb. (*pahina 6*)

⁶Mga bag-ong bomba nga kontrolado sa mga kompyuter aron motumong sa usa ka nahingtungdang target. Bisan unsa pa man ang ipanghambog sa US nga direktang kining makaigo sa mga target, 15-20% sa maong mga bomba ang sipyat ug kasagarang nagaresulta sa pagkamatay sa mga sibilyan ug paggun-ob sa mga sibilyang imprastruktura. (*pahina 6*)

⁷Ang *depleted uranium* naggikan sa *uranium* nga maoy bata kang sangkap sa pagmugna og mga armas nukleyar. Usa kini ka bug-at kaayo (*high density*) nga materyales nga ginagamit sa armadong pagpanggun-ob sa mga tangke ug uban pang sakyanang panggubat. Sumala sa US, dili na peligroso sa tawo ang *depleted uranium* tungod kay hinay na kaayo ang gidala niini nga *radiation*. Apan anaay mga taho sa mga dautang epekto niini sa panglawas sa mga sundalong naggamitan sa naingong mga armas ug sa mga gigamitan niini, ug labaw sa tanan, sa katawhan kundiin gipasapasa kini, sama sa mga nasud nga gigubat sa US sa nangagi. (*pahina 6*)

⁸*Fratricidal*-pinatyanay sa mga magka-tagilungsod (*pahina 6*)

⁹*Embargo*-pagsanta sa gawas-sulod sa mga produkto ug mga sakyanan nga nagdala niini aron pig-oton ang ekonomya sa usa ka nasud ug paluhuron kini sa gamhanang nagpahamtang sa *embargo*. (*pahina 6*)

¹⁰Ang Danube mao ang ikaduha sa pinakataas nga suba sa Europe. Naggikan kini sa Germany padulong sa sidlakan hangtud sa baybayon sa Black Sea sa Romania. Ang Rhine usab usa sa mga nag-unang suba sa Europe. Naggikan kini sa sidlakang Switzerland ug moagi sa Austria, Liechtenstein, France, Germany ug The Netherlands padulong sa North Sea. (*pahina 6*)

¹¹Sukad niadtong Nobembre 2000, Euro na imbis nga US dollar ang gidawat sa Iraq kabaylo sa gibaligya niining lana. Tumong sa maong lakang sa Iraq ang mogawas sa konrtal sa US dollar ug pahuyangon usab kini isip salapi gigamit sa US aron makontrol ang pamatigayon sa lana. (*pahina 7*)

¹²Naghingaping gahum (*pahina 7*)

¹³Mamahimong magdesisyon ang senado ug kongreso nga magtapo ug magtigum isip usa ka *constituent assembly* nga adunay gahum nga bag-uon ang konstitusyon. Nalain kini sa usa ka *constitutional convention* (concon) nga usa ka asembliyang gipili sa usa ka pangkinatibuk-ang eleksyon. (*pahina 9*)

¹⁴Ang giingon nato dinhing Komiteng Tig-organisa sa Baryo (KTB) mao ang gitawag natong Komiteng Tig-organisa sa Katawhan sa Baryo (KTKB). Mahimo kining itukod isip pangandam alang sa komiteng rebolusyonaryo sa baryo (KRB) sa kahimtang nga dili pa nato kini kayang itukod. Gilain nato ang KTKB sa KTB niadtong sayong bahin sa dekada 1970 nga wala nagbase sa bata kang pag-organisa sa masa. (*pahina 17*)